

17. oktober 2025

UKA2025/81

Uunga siunnersuut: Namminersorlutik Oqartussat nalunaarutaata iluarsaanneqarnissaa pillugu illersuinnermut timmiarniarnermullu appanik appaliarsunnillu piniarsinnaanerup nalaani peqassuseq aalaakkaasumik nalilernerqarsimappat zoneni aalajangersimasuni ulluni 30-ni sivitsorneqarnissaa pillugu Naalakkersuisut kingusinnerpaamik UKA2026 sumiiffikkaartumik attuumassuteqartunut tusarniaaqqullugit Inatsisartut aalajangiiffigisassaattut siunnersuut.

(Inatsisartunut ilaasortaq Jens NapätôK', Naleraq)

Piniarnermut maleruagassat nutarterneqarnissaannik siunnersuuteqartumut, Jens Napätôk Naleraq-meersumut, Siumut qujavoq.

Siunnersuut soqutiginartuusoq Siumut isumaqarpoq, aamma naleqqulluinnartutut isigaarput, tassami piniarnermut aaqqissuussinerit sumiiffinni pissutsinut naleqqussarnissaat pingaarpoq.

Appat taateraallu piniarneqartarnerat kulturitsinnut aamma inuussutissarsiutigisatsinnut tunngallutik pingaaruteqartorujussuupput, aamma kissaatigineqartoq Siumup taperserpaa, tassalu piniartuniit atuisuniit nunatta inuiniit ilisimasat piniartullu misilittagaat ilanngullutik aqutsinermi tunngavigineqartariaqartut Siumut isumaqarpoq.

Piniagassat killilersukkat nunat inoqqaavisa pisinnaatitaaffii tunngavigalugu agguaanneqartassasut Siumut isumaqarpoq. Pisassiissutit immikkut ittut aningaasarsiornikkut ilungersunartumik inissisimasunut, neqissaqarniarnikkulluunniit amikkitsiffiusunut pitsaasumik salliutitsilluni agguaanneqartassasut Siumut isumaqarpoq.

Ilaqutariit amerlasuut piniarnermik inuussutissarsiuteqartuupput, aamma piniarneq inuiaqatigiitsinni pingaaruteqarlunnarluni inissisimavoq. Minnerunngitsumik nunaqarfippassuarni isorliunerusunilu inuuniarnermut pingaarutilerujussuuartut sulii inissisimasuulluni. Silap pissusaata allanngoriartornera pissutigalugu piniariartarfiit ilaat tikikkuminaannerulersimapput, taamaattumik Siumut isumaqarpoq, piniarfissatut piffissaliussat naleqqussarneqarnissaanut eqqartuinissaq pissusissamisoortoq, sumiiffinni timmissaqassuseq aamma ilanngullugu eqqartorlugu.



Piniarnermik ingerlatsineq pissaaq, ilisimatuussutsikkut ilisimasat toqqammavigalugit aamma, minnerunngitsumillu, piniartut atuisutut ilisimasalittullu ilisimasaat tunngavigalugit, taakkuuppummi aamma pinngortitamik atuisuusut qanimullu pissutsinik piviusunik ilisimasaqarnerpaat.

Siumumi ilanngullugu pingaartipparput, timmissat allallu uumasut pillugit nalilersuinermi avatangiisit sunniteqartarnerat ilanngullugit nalilersuutigineqartassasut. Imartatsinni angallanneq annertusiartorpoq, qangaanerusoq tikikkuminaatsinneqartartut maanna ulluinnarsiutigineqalersimasutut immata. Assersuutigalugu umiarsuit takornariaasuit amerliartornerat tamatta malugallugillu isigaagut aamma tamatuma malitsigisaanik mingutsitsineruneq nipiliornerulernerlu piupput. Taamaattumik takornariaqataatiniit timmissat piaqqiortarfiisa innarlerneqannginnissaat sulii annersumik sukateriffigalugu pisoqartariaqartoq Siumut isumaqarpoq. Tassa Namminersorlutik Oqartussat timmissat pillugit nalunaarutaat nr. 22 2023-imeersumi kapital 7 aamma 8 matumani eqqarsaatigalugit.

Siumumiit isumaqarpugut Naalakkersuisut nalilersuinissaminni qulakkeertariaqaraat, tamakku aamma ilanngullugit naleqqussaaviginissaat ilaatillugu suliat ingerlanneqartariaqartut.

Siunnersuuteqartup siunnersuutaa ataatsimiisitaliami nalilersorneqassasoq pingaartipparput taamaattoq Naalakkersuisut allannguutissatut siunnersuutaanut tapersiivugut, taannami naapertorlugu 2026-mi ukiakkut Inatsisartut ataatsimiilernissaat sioqqullugu, appat taateraallu piniarneqartarnissaat pillugu innuttaasunut atuisunullu tusarniaaneq ingerlanneqareersimanissaat pisariaqarmat.

Tusarniaaneq pereerpat nalilersuutissat pisariaqartut ingerlanneqarsinnaassapput, Siumullu naatsorsuutigilluinnarpaa, ataatsimiititaliaq pineqartoq tamatumunnga oqallilluarlunilu nalilersuilluarumaartoq.

Taamak oqaaseqarluta siunnersuut Aalisarnermut, Piniarnermut Nunalerinermullu Ataatsimiititaliamut ingerlateqqinneqassasoq innersuussutigaarput.

Erik Jensen
Siumut